

*El Libro de buen amor, Arcipreste de Hita – Carlos Hipólito*

653a ¡Ay, Dios, e quan fermosa viene Doña Endrina por la plaça!

653b ¡Qué talle, qué donaire, qué alto cuello de garça!

653c ¡Qué cabellos, qué boquilla, qué color, qué buenandaça!

653d Con saetas de amor fiere quando los sus ojos alça.

654a Pero, tal lugar non era para fable en amores;

654b a mí luego me venieron muchos miedos e tenblores:

654c los mis pies e las mis manos non eran de sí señores,

654d perdí seso, perdí fuerça, mudáronse mis colores.

655a Unas palabras tenía pensadas por le dezir,

655b el miedo de las conpañas me façian ál departir;

655c apenas me conosçía nin sabía por dó ir:

655d con mi voluntat mis dichos non se podían seguir.

659a Abaxé más la palabra, díxel que en juego fablava

659b porque toda aquella gente de la plaça nos mirava;

659c desde que vi que eran idos, que omne ay non fincava,

659d conmençél dezir mi quexura del amor que me afincava.

661a «En el mundo non es cosa que yo ame a par de vós;

661b tienpo es ya pasado de los años más de dos

661c que por vuestro amor me pena: ámovos más que a Dios;

661d non oso poner persona que lo fable entre nós.

662a »Con la grant pena que paso vengo a vos dezir mi quexa:

662b vuestro amor e deseo, que me afinca e me aquexa,

662c no's me tira, no's me parte, non me suelta, non me dexa;

662d tanto más me da la muerte quanto más se me alexa.

664a »Señora, yo non me atrevo a dezirvos más razones

664b fasta que me respondades a estos pocos sermones:

664c dezitme vuestro talante, veremos los coraçones».

664d Ella dixo: «Vuestros dichos non los preçio dos piñones.